

Es SAARPOLYGON

Midde im Saadaal
zeid sisch's groos unn mäschdisch em Land:
SAARPOLYGON.
Lang, brääd, hoch, e Geribbe aus Stahl
– 250 Tonne schwär unn 30 Meder in die Heh –
zeid sisch hoch drowwe uff dá Berjehall vun dá Grub Duhamel in Ensdorf
seid Sebdeember 2016
als Ausrufezeische
hinnerm Berschbau an dá Saa, mid demm 2012 Schluss waa.

Iwwer zweihunneerdfuffzisch Jòhr hin
hann Berschleid Kolle rausgegrab
aus unserm Boddem zwische Deidschland unn Frankreisch.
Hunneerd Milljone Kubigmeder Kolle
hann Berschleid in Ensdorf aus dá Erd geholl.
Zweidreisisch Milljone Kubigmeder
Tonschiefer, Sandschiefer unn Sandstään aus em Owwerkabbon
hann Berschleid
uff fuffzisch Hegdaa Land
150 Meder hoch uffnanner geschudd forr owwedruff die Hochfläsch,
wo má die ganse 360° runderum kinne gugge
iwwers Saaland unn iwwer Loddringe näwedraan,
unn das 330 Meder hoch iwwer em Meeresspischel.

Unn all das stehd fesched uff sischerem Grund,
eeweso wie frihjer mòò de Berschbau:
50 X 12 Meder groos
unn 1500 Tonnen schwär.

Kumme Leid uff das Denk-Mòòl zu
vun Norde, Oschde, Siide odder Weschde,
ob jedz vun de Seide här,
vun unne aus em Saadaal,
vun owwe aus dá Lufd,
danne enddegge se immer widder
e nei Form,
e nei Figur,
e nei Zeische,
wo ne seriggrufd, wie das mòò waa dòòmòòls,
wo ne ausleed, was heid is,
unn wo e Bild mòòld, wie's mòò kinnd kumme.

Es SAARPOLYGON weisd sich als Dreiegg.
Uffgepassd:
Alles Alde is gang.
Kumme dud jedz ebbes Neies.

Es SAARPOLYGON weisd sisch als Wergzeisch
,Schlääschel unn Eise'.

Häreguggd!
Dòðdemid hann Berscheid die Kollé aus em Bersch geholl.

Es SAARPOLYGON weisd mid seiner villeggisch Figur -
das nämlich heischd Polygon:
Häreguggd!
Uff die Weis hann Berscheid
unner Daa die Stolle gesischerd, wo se vòrgetrieb hann.

Es SAARPOLYGON weisd sich als Kreiz.
Häreguggd!
Berscheid váehre die heilisch Barbara
unn traan das weider, was se als Chrisde vun de Eldre midkridd hann.

Es SAARPOLYGON weisd sich als dobbelder Färderturm,
demm sei Äänseldääle e virzisch Meder lang Brigg zum Driwwergehn
midnanner vábinnd.
Häreguggd!
Vun hie aus sinn die Berscheid
1751 Meter dief nunner in die Erd gefah
bis zu dá 24. Sohl
unn hann in de stärgschde Zeide 14400 Tonne Kollé am Daa rausgeschaffd.

Es SAARPOLYGON weisd sich als ‚die Grub‘, wo forr se all stehd.
Häreguggd!
Iwwer nein Stoggwerge ziehje sich Trebbeuffgäng
mid hunnerddreiedreisch Stufe
unn dezu vill Podeschde inne dursch das riesische Bildweg.

Es SAARPOLYGON weisd sich als Door, wo weid uff stehd.
Häreguggd!
Ach wenn Schluss is mid em Berschbau,
mir glawe fesched draan: Es gehd weider;
forr uns, unser Kinner unn Enggelkinner
duun neie Doore unn Diire sich uff.

Es SAARPOLYGON weisd sich als als Brigg.
Häreguggd!
Es gebbd e Wääsch vum Frihjer zum Heid zum Mòrje.

Es SAARPOLYGON weisd sich,
aus dá Lufd aangeguggd,
als grooser Buschdaab Z.
Häreguggd!
Vun hie aus gebbd's e Z – e Zukunfd.

Es SAARPOLYGON weisd sich als X.
Uffgepassd:
Die Zukunfd is unbekannnd, awwer nidd váschloss.

Drum werd ach es SAARPOLYGON selwer, ach midde in dá Naachd,
vun Dausende vun LED-Lambe vun inne mid Lischd erfilld,
unn's machd so weidhin sichdbaa, was Váwandlung heischd –

als Symbol dòòdeforr, was Wandel is unn sinn kann.

Erinnere soll es SAARPOLYGON
als Denk-Mòòl
an 250 Jòhr Berschbau an dá Saar:
an gudde Zeide unn beese Zeide,
an die schwär Aawed unner Daach,
an die Schäde, wo die Gruwe iwwer Daach aangerischd hann
unn an die Mensche, wo im Bersch ihr Läwe losse mussde.

Erinnere soll es SAARPOLYGON
als Denk-Mòòl
an 250 Jòhr Berschbau an dá Saar:
wie Kolle unn Stahl unn Energie vábunn ware midnanner,
wie grad im Saaland ääns zum annere alles sesamme geheerd had.

Erinnere soll es SAARPOLYGON
als Denk-Mòòl
an 250 Jòhr Berschbau an dá Saar:
an de Schluss, Väännerung vun Grund uff; e neier Aanfang im'me Land,
wo, weil's leid an dá deidsch-franseesisch Grens
grad ach weje denne Kohle
vill Kriesche had erläwe misse.

Erinnere soll es SAARPOLYGON
als Denk-Mòòl
an 250 Jòhr Berschbau an dá Saar:
wie má die Montanunion gegrind had
– die Keimzell vun dá Europäisch Gemeinschafd –
wo ihr eischner Beitrach geleischd had dezu,
dass má heid in Mitteleuropa
seit meh wie 70 Jòhr
in me friedliche Kernland läwe.

Heid is es SAARPOLYGON e Pladz zum Erinnere.
Heid is es SAARPOLYGON e Pladz, wo unser gemeinsames Isch sisch feschedhalld.
Heid is es SAARPOLYGON e Pladz, wo má sisch begeeschend.

Autor: Christoph Schmidt, Überherrn
schmidtcg@web.de

Übertragung in die rheinfränkische Dialektsprache:
Peter Eckert, Wadgassen-Differten
eckerpet@web.de

Vortrag oder Abdruck des Textes ist mit Autorenangabe grundsätzlich erlaubt.
Eine kommerzielle Nutzung bedarf der Zustimmung der Autoren.